

# Project «Medias rumantschas 2019»

Emprimas ideas per ina collavuraziun sur ils cunfins da las regiuns ora

■ (LR) La Lia Rumantscha (LR) ha orientà venderdi passà davart il stan actual da las discussiuns en connex cun l'avegnir da las medias rumantschas. A chaschun d'in inscunter cun ils schefredactors da las medias rumantschas èsi sa mussà ch'i dovra in tschert aspect surregional en las medias rumantschas e che cooperaziuns futuras èn perquai d'avantag per tuts.

Ils schefredactors èn en pli stads d'accord ch'igl è necessari da publitgar en l'avegnir dapli en moda digitala. A medem temp renconuschan els dentant er il basegn per gasettas stampadas. Strusch insatgi che metta en dumonda l'impurtanza dals meds da massa rumantschs per il mantegniment e la promoziun da lingua e cultura rumantscha. La gronda part da l'offerta sco ella exista oz po vegnir realisada sulettamain cun sustegn dal maun public. La confederaziun ed il chantun Grischun finanzieschan ils servetschs da l'Agentura da novitads rumantscha (anr) che stattan a disposiziun a tut ils editurs da meds da massa rumantschs. Era la spierta da Radiotelevisiun Svizra Rumantscha (RTR) è dependenta da las taxas da recepciun per radio e televisiun. Questas tematicas èn vegnidas discutas venderdi, ils 9 da favrer en il rom da l'inscunter, al qual la Lia Rumantscha ha envidà ils schefredactors dals meds da massa rumantschs (La Pagina da Surmeir, La Quotidiana, Posta Ladina/Engadiner Post ed RTR) ed il manader da l'anr. Medemamain il venderdi passà ha gi lieu ina seduta d'infurmaziun cun las redacturas ed ils redactors da l'anr. La LR ha nizzegià la chaschun d'orientar las personas pertutgadas directamain davart



Il secretari da la Lia Rumantscha Martin Gabriel ha surpiglià l'incumbensa da mainaproject da las «Medias rumantschas 2019». MAD

il stan actual da las discussiuns en connex cun la strategia da medias per l'avegnir dals meds da massa ch'ella è londervi dad elavurar per incumbensa da la confederaziun e dal chantun Grischun.

## Intensivar la collavuraziun

Sut l'egida da la LR cun ses secretari general *Martin Gabriel* èn vegnids instradads ils ultims mais numerus pass che han la finamira da pudair garantir a la popu-

laziun rumantscha er en l'avegnir in'offerta da medias adequata. Ina part impurtanta da quest process è il contact direct cun ils editurs ed ils schefredactors dals meds da massa ch'enconuschan il meglier las sfidas dal pitschen martgà da medias rumantschas. Ils schefredactors han exprimì a chaschun da l'inscunter il venderdi passà ch'els vesessan avantatgs en ina collavuraziun pli stretga sin tscherts champs. Els vesan en pli la necessitad da

publitgar en l'avegnir dapli en moda digitala, renconuschan dentant er il basegn per gasettas stampadas. Ils schefredactors èn conscients da l'impurtanza da tscherts aspects surregionals en las medias rumantschas. Per las gasettas che sa drizzan primarmain a lur regiun n'han ils cuntegns surregionals chapaivlamain betg la medema muntada. Ina collavuraziun sur ils cunfins da las regiuns ora purtass dentant avantatgs per tuts.

## La finamira è ina strategia per l'avegnir

Il project «Medias rumantschas 2019» da la LR vul formular ina strategia per la spierta futura dals meds da massa rumantschs. Gabriel che maina il project è persvas ch'i dovra ina strategia cun ina purschida drizzata vers il futur. «La sfida è da chattar ina via per ademplir dad ina vart il basegn actual per gasettas stampadas, senza tralasar da l'autra vart da preparar il terrain per l'avegnir digital che na sa ferma betg avant ils cunfins da nossas valladas», manegia Gabriel. La tenuta dad RTR ch'è fermamain pertutgada dal svilup digital è clera. *Ladina Heimgartner*, directura RTR, di tar questa dumonda: «Nus essan fitg interessads da participar al project da collavuraziun e da sviluppar da cuminanza la basa che pussibilescha a Rumantschas e Rumantschs da vegnir infurmads er en il futur en lur linguatg. La piazza da medias grischuna sto collavurar pli fitg en futur per mantegnair sia diversitad en favur dal public.»

## Il project cuntinuescha

En tge furma, quantas giadas, sin palpiri e/u en la rait e da tgi che per exempel ina gassetta rumantscha vegn edida en il futur è tenor Gabriel dumondas che basegnan anc insaquantas discussiuns e che dependan finalmain da las decisiuns dals editurs responsabels. En il rom dal project «Medias rumantschas 2019» èn previs era lavuratori publici che han lieu questa primavaira en las regiuns rumantschas. Uschia ha in e scadin la pussaivladad da participar activamain a las discussiuns davart l'avegnir dals meds da massa rumantschs.